

NUA È QUAI? – LIGN DAL MAIS

Sill'antieriura ruta da transit en Lombardia

Cun «il pli davantsi a dretga» avain nus titulà e gist er situà il lieu che nus avain mussà cun il lign da l'october. La fotografia mussava Duvin e quai han massa lecturas e lecturs savì responder endretg.

SUSI ROTHMUND/FMR

Duvin è in pitschen vitg alpin e dumbra 76 abitantas ed abitants. Ina bella part da quels èn anc uffants u giuvenils – numadamain 18 persunas. Ustarias na dat quai neginas a Duvin. Il vitg è situads il pli davantsi a dretga da la Val Lumnezia sut, tucca però tar la vischnanca da Ilanz/Glion. Vals profundas spartan ils abitants da Duvin da lur vischins da Pitasch. La Val Uastg sparta Duvin da Camuns. Duvin sa sanfla sin ina terrassa fitg sulegliva sin ina altezza da 1 180 m s.m. ed ins po giudair da là in bel panorama sin l'entira Val Lumnezia. Duront excavaziuns sin in crets ella vischinonza da Duvin han ins anflau fossas. Quellas cumprovan che Duvin era habitau gia dil temps avon Christus. Entuorn igl onn 840 suenter Christus ei Duvin vegnius documentaus l'emprema ga sco culegna Auna. L'introducziun dalla reformaziun ha giu liug il 1526.

Lign dal november

Oz tschertgein nus il num dal vitg sin la fotografia. Quel dumbra 84 abitantas ed abitants, da quels èn 7 uffants u giuvenils en fin 18 onns. Il lieu tschertgà vegn numnads per l'emprima giada en igl urbari imperial da 831. Quai vegn dentant supponì ch'il lieu saja blier pli vegls. Ina giada fuvà il lieu dasper ina ruta da transit impurtant. En quest lieu han ils abitants survegnì glisch electrica pir il 1936. Quai di ch'ella ha funcziunà per tuts èsi vegnì festivà e saltà tut la notg.

Bellezza premis

Da las cartas postalas ch'èn arrivadas cun la dretga soluziun «Duvin» avain nus pu-



FOTO SUSI ROTHMUND

spè gi da trair la sort per ils bels premis. Ils blers da quels vegnan tramess als victurs directamain da noss sponsurs, quai succeda proximamain. Igl è adina puspè satisfaschant d'astgar regalar in premi pli bel ed attractiv che l'auter. Sa participar al lign sa paja perquai probablmain baud u tard er per vus. Forsa pudais vus

prest giudair in premi e cun cletg er ina u l'autra excursiun en in lieu turistic sco Sedrun, Scuol u Val Sogn Pieder. Perquai nun emblidai er oz betg da scriver sin ina carta postalà il num dal vitg che nus tschertgain. Nudai vossa adressa cun numer da telefon e trametta quella en fin il 15 da december dal 2021 a:

Fundaziun Medias Rumantschas FMR
Susi Rothmund
Via Foppa 15
7176 Cumpadials

Nos sponsurs

Per il 2021 avain nus chattà sponsurs generus e pudain uschia er il november

porscher premis attractivs per ils victurs dal lign mensil: Duas cartas dal di da la Skiarena, duas cartas dal di dal Bogn Engiadina a Scuol, duas cartas dal di dal Runal solar a Tenna, abunament da sesiun per ir cun patinas per creschids (senza patinas) regalà dal Center Fontauna a Mustér, ina carta dal di da la Matterhorn Gotthard Bahn, ina carta dal di dal territori da skis en Val S. Pieder regalada da las Pendicularas Vals3000, in cudesch sponsurà da la Lia Rumantscha, in cudesch u in disc cumpact regalads da la Chasa Editura Rumantscha ed in cudesch da notizias da la Fundaziun Medias Rumantschas. Grazia fitg e cordialmain a noss sponsurs dal 2021! La soluziun da quest lign vegn publicgada la fin december 2021 cun il davos lign da quest onn. Buna fortuna!

Ils victurs

1. premi: Georgina Camenisch, Duvin (2 cartas dal di da la Skiarena Andermatt Sedrun); 2. premi: Alfred Caminada, Lumbrin (2 cartas dal di dal Bogn Engiadina a Scuol); 3. premi: Ida Morand, Basilea (2 cartas dal di dal Runal solar a Tenna); 4. Iso Tuor, Glion; abunament da 10 da raiver per creschids (senza material) regalà dal Center Fontauna a Mustér. 5. Premi: Flurina Caduff, Wädenswil; ina carta dal di da las Pendicularas Vals3000; 7. Bettina Casanova, Surcasti (1 cudesch da la Lia Rumantscha); 8. premi: Hans Jakob Haag, Scuol (1 cudesch da la Casa Editura Rumantscha); 9. premi: Rita Casanova, Vignogn (1 cudesch da notizias da la Fundaziun Medias Rumantschas) Nua è quai?

ZULPRINS

Nous nusezzas faschagn la nossa istorgia!

«Dovrigl ansomma feminissem?» – Cun chella dumonda sung ia adegna puspè confruntada.

Exact an chels muments am vign andamaint igl citat da Simone de Beauvoir: «L'antiera istorgia da donnas è neida fatga digls omens». E cun sgarschour stò ia realisar, tgi ena gronda part dalla societad vei betg, tgi la istorgia da donnas è anc adegna dominada dad omens. Percheigl è la mia rasposta sen chella dumonda curta: Ea, an mintga cassa!

La rasposta detagleda è en po pi cumplexa, però tgapibla, schi la viglia è cò. Chest text è ena aproximaziun ad en tema cumplex, tgi sa basa sen en sistem patriarcal.

Igl antscheva cun la differenza dallas paias. Tenor igl Uffezi federal da statistica è la differenza da paias tranter donnas ed omens igl onn 2018 stada tar 12,0%. Per demonstrar: Ena donna tgi ò antschet a luvrar igls 01-01-2021 lavoura gratuit anfignen igls 20 da favrer, en om tgi ò antschet igl madem taimp è paea davent dalla antschatta. La cunsigliera federala *Simonetta Sommaruga* ò declaro chel stadi cleramaintg alla sessiun da donnas. Schi dei tgi la lavoura da donnas vala pi pac e la societad dat da creir a donnas, tgi ellas valan pi pac, prospereschian igl sexissem e la discriminaziun venavant.

La Svizra è dependenta da lavour paeda, ma cunzont er da lavour fatga voluntariamaintg e gratuita. Summa summarum èn igl onn 2016 neidas prestadas 7,8

milliardas ouras da lavour paedas e 9.2 milliardas ouras da lavour betg paedas. La lavour nunpaeda sa metta ansemen da lavour da tgesa e famiglia (p.ex. tgira d'unfants, cuschinar, etc.) e lavour voluntaria (p.ex. tgira da beadis e beadias, angaschi ainten ena uniun). Donnass surpeglian dus terz da chella lavour tgi è relevanta pigl sistem. E chegl influenzescha directamaintg la posiziun da donnas aint igl mond professiunal e surtot las rentas da donnas. Dalla cumcompatiblad da fami-



GRAFICA MAD

glia e professiun vign anc adegna piglia mengia pac risguard, uscheia tgi bieras donnas on mianc la schelta tranter luvrar venavant ainten lour professiun u surpigliar la lavour nunpaeda.

Donnas cun pitschens pensums e chellas, tgi surpeglian la lavour nunpaeda on loccas massivas aint igl provedimaint da vigliadetna. Per consequenza on donnas an media ca. 20 000 francs pi paca renta tgi omens ad onn. An consequenza èn ellas pertutgeidas pi savens dalla povradad dalla vigliadetna. E glez quasi scu «angraztg» per trer se e tgirar la proxima generaziun.

Venavant è mintga tschintgavla donna ena victima da violenza sexuala. Starmontous blers delicts sexuals vignan mianc tgisos, cuncheigl tgi victimas survignan savens betg raschung. Glez graztg alla nossa lescha sexuala, tgi fundescha betg sen la maxima da consentimaint, mabagn segl prancepi, tgi victimas ston expressivamaintg deir NA e sa dustar. Glez è savens mianc pussebel perveia digl stadi da choc. La maxima da consentimaint fiss miglra. Lezza pretendiss percontrari, tgi sex sainza consentimaint seia ena violaziun.

Digl reminent è angal en quart dallas posiziuns scientificas an Svizra occupadas da donnas. Chegl magna tigl schinumno gender data gap. Igl gender data gap è la mancanza d'infurmaziuns scientificas davart igls aspects fisicals e psichics da donnas. La scienza peglia per retschertgas e perscrutaziuns predominantamaintg prototips masculins, donnas da l'oter mang èn ena divergenza dalla norma. Chegl sa mossa an divers aspects: Per exaimpel èn igls sintoms per en infarct digl cor tar donnas betg per-

scrutos, la tschinta da sierrezza ed igl airbag èn coordinos per igl corp masculin ed er igl scoldamaint è drizzo aint per omens. Ainten la scienza è igl motto «it's a man's world» deplorablaintg anc fitg preschent.

I dess anc indumbrabels exaimpels davart la inegalitad tranter las schlattagnas. E schi dei tgi visius calan lò, noua tg'igl noss futur antscheva, dovrigl feminissem. E betg d'ambliar: er omens profiteschian digl feminissem – el igls dat la schanza da sa deliberar da rollas viglias da schlattagna e da reinventar lour rolla ainten la societad.

Per catar ena fegn, lessa però neir tar aspects concrets per ena midada aint igl noss sistem patriarcal.

Ils «zulprins»

Ils «zulprins», uschia sa numna la rubrica per auturas ed auturs giuvenils, ina rubrica che cumpara en collavuraziun da la GiuRu Gjuventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuvenils. Ils «zulprins» duain damai far qua u là sbrinzlas!

Dapli infurmaziuns davart la GiuRu sin www.giuru.ch ubain via mail a giuru@giuru.ch.

Igl mond dovra testas avertas e progressivas. Er daple donnas ainten mastiers da MINT (professiuns da matematica, informatica, scienza naturala e tecnica) e professiuns academicas è necessari. I dovra discussiuns fundamentalas sur dalla nossa societad e las rollas da donnas ed omens.

Fitg impurtant è surtot er ena represchentaziun eguala ainten gremis politics. Percheigl donnas: nous ischan 51% dalla populaziun. Seias curaschousas – vous savez chegl. Furme gruppas, collie las vossas fermezzas, tschartge allieidas ed az sustigne l'egna l'otra.

Schintgigia ans vign navot, però ansemen ans togia igl mond!

Luna Weggler

Feminissem

Feminissem monta betg la midada digl patriarcat tar en sistem matriarcal inegal. Feminissem descreiva er betg tot igls omens scu noschs u culpants. Feminissem è igl muvimaint, tgi sa metta aint per la egalitad, la dignitad umana e l'autodeterminaziun da tot las persungas, independent dalla schlattagna, digl gender, dalla sexualitad, dalla etnia, dalla furma fisica u psichica ni dalla naziunalitad. Tots e tottas tgi s'angaschan per chels prancepis èn an en tschert gro feminists/as.